



06 Novembru 2018
Komunikadu Imprensa
Parlamentu Nasionál

**Primeiraves Provedoria Direitu Umanus no Justisa lidera hosi fetu:
JSMP kongratula Provedóra Direitu Umanu no Justisa eleitu**

Primeriaves Provedoria Direitu Umanus no Justisa (PDHJ) Timor-Leste lidera hosi figura fetu ida depoisde periódu konsekutivu sira anteriór Provedor lideradu hosi figura mane nain rua. JSMP kongratula Parlamentu Nasionál (PN) ba progresu ida-ne'e tanba hatudu avansu signifikativu iha komitmentu estadu nian atu promove igualdade no partisipasaun fetu iha instituisaun xave sira estadu nian, partikularmente iha instutuisaun direitu umanus ida hanesan PDHJ.

Mesmu nune'e, JSMP kritika PN tanba prosesu ne'e la permite espasu no oportunidade ba kandidatura sira atu hato'o sira nia vizaun no misaun, atu nune'e kandidatu sira demonstra sira ninia merit, perspetiva no kompeténsia antes Parlamentu Nasionál nomeia/hili entre kandidatura hirak ne'e ida ne'ebé elejível. Nomeasaun ho forma ida-ne'e ladun iha diferensia boot ho prosesu sira anterior, mesmu PN loke prosesu ne'e publikamente atu kandidatura sira kompete.

Parlamentu Nasionál iha Segunda-Feira 05 Novembru 2018, liuhosi sesaun plenária, halo eleisaun ba Provedór Direitu Umanu no Justisa (PDHJ) foun. Kandidatu sira ba pozisaun ne'e hamutuk na'in 12. Entre kandidatu sira ne'e, kandidatu na'in rua mak pasa ba segundu volta mak hanesan Sra. Jesuína Maria Ferreira Gomes votu 31 no Sr. Horacio de Almeida ho votu 20.

Rezultadu finál iha eleisaun segundu volta nian hatudu katak Sra. Jesuína Maria Ferreira Gomes mak eléitu ba kargu Provedór foun ho votu afavór 38. Entertantu husi kandidatura Horacio de Almeida hetan votu 23, husi totál deputadu na'in 61 ne'ebé partisipa iha votasaun.

“JSMP apresia Parlamentu Nasionál ne'ebé hili kandidatu fetu ida hodi lidera PDHJ no kongratula Provedora foun ne'ebé hetan konfiansa husi Parlamentu Nasionál atu lidera instituisaun direitu umanu ne'e durante tinan 4 oin mai”, dehan Diretór Ezekutivu JSMP, Luis de Oliveira Sampaio.

Durante tinan barak nia laran, PDHJ hetan kritika makaas no lamentasaun oioin hosi sosiedade tanba PDHJ ladun utiliza nia kbiit no kompetensia sira ne'ebé Konstituisaun atribui ho adekuaudu atu defende asuntu direitu umanus sira ne'ebé akontese iha ita nia sosiedade. Partikularmente atu utiliza kompetensia sira tuir artigu 150 no 151 Konstituisaun Republika atribui ba PDHJ. JSMP hein katak Provedora eleitu, bele hatan ba espetativa públiku liuhosi dinamiza no promove servisu PDHJ nian sai ativu no produtivu liutan iha futuru durante ninia mandatu.

Iha parte seluk, JSMP mós halo observasaun ba servisu PDHJ nian liuhosi rede rejionál Asia no Pasífiku “the Asian NGOs for National Human Rights Institutions (ANNI)” hodi fornese no atualiza anualmente kapitulu ida ba relatóriu anuál ANNI kona-ba dezempeñu PDHJ nian iha knaar protesau no promosaun direitu umau, justisa no boa governasaun iha Timor-Leste.

Rezultadu avaliasaun ba servisu instituisaun direitu umanu sira iha rejiaun Asia no Pasífiku hatudu katak PDHJ sai hanesan refénsia. JSMP rekomenda ba lideransa Provedóra eleitu foun ne'ebé iha esperiénsia tinan barak ona iha instituisaun refere bele haforsa, hadi'a no konsolida liutan servisu instituisaun PDHJ nian atu proteje no promve direitu umanu, justisa no boa governasaun tuir mandatu servisu PDHJ nian.

JSMP mós hein katak, Provedora eleitu ne'e sei nakloke-an atu rona no konsidera hanoin hosi sosiedade sivíl relaciona ho kestaun direitu umanu sira ne'ebé sei pendente.

JSMP enkoraza Provedora eleitu atu utiliza kompenténsia sira ne'ebé Kontituisaun fó hodi salvaguarda interese públiku no defende ita-nia Lei Inan no ita nia estadu direitu demokrátiku.

Tuir informasaun husi meja plenária informa katak iha tempu badak Parlamentu Nasionál sei halo karta notifikasaun ba provedóra foun atu prepara agenda plenária estra-ordinária hodi fó tomada pose ba Provedór eléitu.

Adisionalmente, informasaun detallu kona-ba rejultadu votasaun ba kandidatura na'in 12 ne'ebé kompete iha primeira volta mak hanesan tuir mai ne'e. Sr. Aniceto Guru Berteni Neves hetan votu 0, Sr. Filipe Rodrigues Pereira hetan votu 2, Sr. Florindo José Cristóvão hetan votu 0, Sr. Henrique de Oliveira Ximenes hetan votu 0, Sr. Horácio de Almeida hetan votu 20, Sra. Isabel da Costa Fereira hetan votu 3, Sr. Jaime Xavier hetan votu 0, Sra. Jesuína Maria Ferreira Gomes votu 31, Sr. José Luis Oliveira hetan votu 1, Sr. José Pereira da Conceição hetan votu 0, Sr. Nívio Leite Mangalhães hetan votu 3, Sr. Silvério Pinto Baptista hetan votu 0 no votu branku ida (1) husi total deputadu na'in 61 ne'ebé partisipa iha votasaun.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Direasaun e-mail: luis@jsmp.tl
www.jsmp.tl
Telefone: 3323883